

— 781 —

XEERKA HABKA MADANIGA

BUJGGA KOOWAAD

QODOBBADA GUUD

BAABKA KOOWAAD

HAY'AADKA GARSOORIDDA

MADAXA KOOWAAD

GARSOORAHA

QAYBTA KOOWAAD

WILAAYADDA GARSOORKA IYO AWOODDA

*Qodobka 1aad*

*Wilaayadda Maxkamadaha Caadiga ah*

Maxkamadaha caadiga ahi waxay leeyihiin wilaayadda Garsooridda Madaniga ah sida waafaqsan qodobbada Xeerkaan haddii aan lagu sheegin xeer gaar ah si taas ka duwan.

*Qodobka 2aad*

Heshiis laguma beddeli karo Wilaayadda Garsooridda Soomaalida

Ma bannaana in laga tago wilaayadda Garsooridda Soomaaliyeed iyadoo la qaadanayo Garsoorid shisheeye ama heshiisyaal (arbitri) dibadda lagu gaaray haddii ayna dacwaddu ku saabsanayn xilal (Obligazione) ka dhexeeya dad shisheeye ah ama qof shisheeye ah iyo mid muwaadin ah (cittadino) oo aan degganeyn, aanna ku nooleyn Soomaaliya.

*Qodobka 3aad*

*Dacwad ka oogan Maxkamad shisheeye horteed*

Lagama tagi karo wilaayadda Garsooridda Soomaaliyeed markii laga oogo isla dacwadaas ama dacwad kale oo iyada ku xiran Maxkamad shisheeye horteed.

— 782 —

Qodobka 4aad

Maxkamadda awoodda u leh Garsooridda Shisheeyaha

Wey suurtoobi kartaa in qof shisheeye ah laga dacweeyo Maxkamad Soomaaliya horteed.

1. Haddii uu deggen yahay ama ku nool yahay Soomaaliya ama uu ku leeyahay wakiil loo oggolaaday in uu dacwodo.
2. Haddii dacwaddu ku saabsan tahay xoolo laga helo Soomaaliya ama dhaxal qof Soomaali ah ama xoola dhaxal ah ee dacwaddooda laga furay Soomaaliya ama xilaal (obbligazione) ka ghashay ama ay waajib tahay in laga fuliyo Soomaaliya.
3. Haddii dacwaddu ku xiran tahay mid kale oo ka taagan Maxkamad Soomaaliya horteed.
4. Haddii Garsooraha Dawladda uu ka mid yahay qofka shisheeyaha ah uu awood u leeyahay in uu galo dacwooyin la mid ah kuwa lagu ogey qof Soomaali ah.

Qodobka 5aad

Waqtiga lagu goynayo awoodda Garsooridda

Wilaayadda Garsooridda iyo awooddaba waxaa lagu goynayaa xaaladaha joogta markii la oogay dacwadda mana saameynayaan isbeddelaad ka dib dhaca.

Qodobka 6aad

Heshiis laguma beddeli karo awoodda

Uma bannaana dhinacyada inay ku heshiiyaan inay ka tagaan awoodda, haddii uu Sharcigu sidaa caddeynayn.

QAYBTA LABAAD

AWOODDA XAGGA MAWDUUCA, QIIMAHA IYO DALKA

Qodobka 7aad

Awoodda Maxkamadda Degmada

Maxkamadda Degmada waxay awood u leedahay dacwadaha qiimaha oo ka badnayn 3000 Sh. So. iyo arrimaha oo idil ee la xiriira qoyska, ayadoo aan la fiirin qiimaha. Awoodda Maxkamadda Degmada waxay ku egtahay inta degmadu ku fadhido.

Qodobka 8aad

Awoodda Maxkamadda Gobolka

Maxkamadda Gobolka waxay awood u leedahay dacwadaha qiimaha ka badan yahay 3000 Sh. So. dhammaantood iyo kuwa aan qiimaha la xadayn. waxay kale oo awood u leedahay Dacwadaha shaqada dacwadaha Dawladdu dhinac ka tahay iyo dacwad kasta oo xeerar gaar ahi awood u siiyaan.

Maxkamadda Gobolka waxay awooddeedu ku egtahay inta Gobolku ku fadhiyo.

Qodobka 9aad

Awoodda Maxkamadda Rafcaanka

Maxkamadda Rafcaanka waxay awood u leedahay inay gasho xukunnada Rafcaanka laga soo qaato dhammaantood oo ka yimaada Maxkamadda Degmada ama Maxkamadda Gobolka. Waxay kale oo awood u leedahay inay kala saarto dacwadaha ku saabsan wilaayadda garsooridda iyo awoodaha ee ka dhex dhasha Maxkamadaha Degmooyinka ee raacsan iyo kuwaas iyo Maxkamadda Gobolka.

Sidoo kale waxay awood u leedahay keli ahaanteed arrimaha ku lug leh fulinta Xukunnada Shisheeyaha ah.

Awoodda Maxkamadda Rafcaanku waxay ku eg tahay dal ahaan inta Gobolku ku fadhiyo.

Qodobka 10aad

Awoodda Maxkamadda Sare

Awoodda Maxkamadda Sare waxay saamaysaa Jamhuuriyadda dhammaanteed, waxayna awood u leedahay:-

1. Dhammaan Rafcaannada laga soo qaato xukunnada ka soo baxay Maxkamadaha darajada Labaad iyo kuwa ka soo baxa Maxkamadaha darajada koowaad ee eyna bannaaneyn in Maxkamadaha dhexe rafcaan looga qaato.
1. Dhammaan dacwadaha idaariga ah.
3. Dacwadaha ku saabsan arjiyada lagu warsanayo dib ugu noqoshada Xukunnada iyada ka soo baxa.
4. Dhammaan arrimaha kale ee qaanuunku awood u siinayo.
5. Kala saaridda nidaamka Garsooridda iyo awoodaha ee ka dhexdhaca Maxkamadaha caadiga ah iyo kuwa aan caadiga ahayn, iyo kuwa gaarka ah iyadoo laga reebayo inta uu sheegay qodobka 9aad

Qodobka 11aad

Qaddaridda Qiimaha Dacwadda

Qaddaridda qiimaha dacwadda xagga awoodda waxa saldhig u ah arjiga Maxkamadda la keensanayo.

QAYBTA SADDEXAAD

AWOODDA XAGGA DALKA

Qodobka 12aad

Xaddididda awoodda Maxkamadda xagga dalka

Awoodda xagga dalka ee Maxkamada waxaa xaddidaya meesha uu ku nool yahay ama uu deggan yahay cofka dacwadda loo haysto (dacweysanaha), hadduusan xeer kale sidaas si ka duwan sheegin.

Haddii dacweysanuhu uusan degganayn ama ku noolayn Soomaa liya ama aan la aqoon meesha uu deggan yahay ama uu ku nool yahay waxa awoodda iska leh Maxkamadda ku taal meesha uu deggan yahay Dacwooduhu.

Qodobka 13aad

Maxkamadda Awoodda u leh dacwadaha ku saabsan xuquuqda caynta ah (Reali) iyo dacwadaha ku lug leh lahaanshaha maguurtada

Dacwadaha ku saabsan xuquuqda caynta ah ama maguurtada ah iyo dacwadaha ku lug leh lahaanshaha maguurtada waxaa awood u leh Maxkamadda ku taal meesha laga helo xoolaha maguurtada ah.

Qodobka 14aad

Maxkamadda awoodda u leh dacwadaha ku saabsan Xilalka

Waxaa bannaan ikhtiyaar ahaan in dacwadda ku saabsan xilalka laga hor oogo Maxkamadda ku taal meesha xilku ka dhashay ama waajid tahay in laga fuliyo.

Qodobka 15aad

Maxkamadda awoodda u leh dacwadaha dhaxalka

Waxa awood u leh dacwadaha dhaxalka Maxkamadda ku taal meesha xoolaha laga dhintay lagu dhaxlayo.